



REPUBLIKA E SHQIPËRISË  
KËSHILLI I EMËRIMEVE NË DREJTËSI

VENDIM  
Nr. 11, datë 17.07.2020

**PËR NDALIMIN E KANDIDIMIT TË ZONJËS ARDITA BUNA (ALSULA) NË VENDIN VAKANT PËR GJYQTAR NË GJYKATËN KUSHTETUESE, SHPALLUR NGA KUVENDI I REPUBLIKËS NË DATËN 28.08.2018 DHE RISHPALLUR NË DATËN 21.08.2019**

Këshilli i Emërimeve në Drejtësi, i përbërë nga :

<b>Vitore Tusha</b>	- Zëvendëskryetare
<b>Fiona Papajorgji</b>	- Anëtare
<b>Arta Marku</b>	- Anëtare
<b>Miranda Andoni</b>	- Anëtare
<b>Saida Dollani</b>	- Anëtare/Relatore
<b>Ludovik Dodaj</b>	- Anëtar
<b>Arjan Qafa</b>	- Anëtar

Asistuar nga sekretare **Dorina Dulaj**,

Me praninë e Avokates së Popullit, zonjës Erinda Ballanca, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **zoti Bledar Dervishaj**, përfaqësues i autorizuar i Presidentit të Republikës,
- **znj. Katrin Treska**, përfaqësuese e autorizuar e Presidentit të Republikës,
- **në mungesë të përfaqësuesve të tjerë** të subjekteve të ftuara sipas ligjit për pjesëmarrje,

në mbledhjen e datës 17.07.2020, mori në shqyrtim çështjen që i përket:

**KANDIDATI PËR GJYQTAR  
NË GJYKATËN KUSHTETUESE:**

**Znj. ARDITA BUNA (ALSULA)**

**OBJEKTI:**

Urdhërimi i ndalimit të kandidimit të znj. Ardita Buna (Alsula), në vendin vakant për gjyqtar në Gjykatën Kushtetuese, të shpallur nga Kuvendi i Republikës në datën 28.08.2018 dhe rishpallur në datën 21.08.2019.

## KËSHILLI I EMËRIMEVE NË DREJTËSI

Pasi dëgjoi relatimin e anëtares së Këshillit, **zonjës Saida Dollani**, mendimin e paraqitur nga Avokati i Popullit, zonja Erinda Ballanca, në cilësinë e vëzhgueses së përhershme në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

### VËREN:

#### I. Rrethanat e çështjes

1. Në zbatim të nenit 125 të Kushtetutës dhe të nenit 7/c të ligjit nr. 8577, datë 10.02.2000 “Për organizimin dhe funksionimin e Gjykatës Kushtetuese të Republikës së Shqipërisë”, i ndryshuar (në vijim ligji nr. 8577/2000), Kuvendi i Republikës, në datën 28.08.2018, ka shpallur hapjen e procedurës së aplikimeve për plotësimin e vendit vakant, vakancë e parakohshme, të krijuar në Gjykatën Kushtetuese për shkak të mbarimit përpara afatit ligjor të mandatit të gjyqtarit Fatos Lulo.

2. Këshilli i Emërimeve në Drejtësi, në përfundim të procedurës së verifikimit të kandidaturave, me Vendimin nr. 115, datë 09.08.2019, vendosi:

- Njoftimin e subjektit që e ka vënë në lëvizje, Kuvendin e Republikës së Shqipërisë, për të vlerësuar rishpalljen e thirrjes për paraqitjen e kandidaturave për plotësimin e vendit vakant në Gjykatën Kushtetuese, të shpallur nga Kuvendi në datën 28.08.2018.

3. Në zbatim të vendimit nr. 115, datë 09.08.2019 të Këshillit të Emërimeve në Drejtësi dhe të nenit 125 të Kushtetutës, si dhe të nenit 7/c të ligjit nr. 8577/2000, Kuvendi i Republikës, në datën 21.08.2019, ka rishpallur hapjen e procedurës së aplikimeve për plotësimin e vendit vakant, vakancë e parakohshme, të krijuar në Gjykatën Kushtetuese për shkak të mbarimit përpara afatit ligjor të mandatit të gjyqtarit Fatos Lulo.

4. Në përfundim të procedurës së aplikimeve për shprehjen e interesit për kandidim, Kuvendi i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 7/a të ligjit nr. 8577/2000. Ndërmjet kandidatëve që kanë shprehur interesin për plotësimin e këtij vendi vakant të krijuar në Gjykatën Kushtetuese është edhe zonja Ardita Buna (Alsula).

5. Në vijim nga ana e Këshillit të Emërimeve në Drejtësi, me Vendimin nr. 136, datë 21.09.2019, u vendos:

- Fillimi i procedurës së verifikimit, vlerësimit, pikëzimit dhe renditjes së kandidaturave për vendin vakant në Gjykatën Kushtetuese, vakancë e parakohshme, të shpallur nga Kuvendi në datën 21.08.2019.

6. Në zbatim të nenit 228 të Ligjit nr. 115/2016, ‘Për organet e qeverisjes së sistemit të drejtësisë’(në vijim ligji nr. 115/2016) dhe të pikave 5, 27 deri 37 dhe 41 të aktit nënligjor normativ, Vendimit të Këshillit të Emërimeve në Drejtësi nr. 2, datë 15.02.2019 “Për procedurën e shortit të caktimit të relatorëve për pozicionet vakante në çdo institucion”, si

edhe të pikës 4 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, në të njëjtën ditë të mbledhjes së zhvilluar në datën 21.09.2019, është realizuar edhe procedura për caktimin me short manual të relatorëve për vendin vakant të krijuara në Gjykatën Kushtetuese.

7. Sipas rezultatit të shortit manual të realizuar nga Këshilli i Emërimeve në Drejtësi, lidhur me vendin vakant në Gjykatën Kushtetuese, të shpallur nga Kuvendi i Republikës në datën 28.08.2018 dhe rishpallur në datën 21.08.2019, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, u caktua anëtari i Këshillit, zoti Fatri Islamaj. Gjatë zhvillimit të procedurave të verifikimit për këtë pozicion vakant, rezultoi se relatori Fatri Islamaj me vendim të Komisionit të Pavarur të Kualifikimit në datën 10.12.2019 është shkarkuar nga detyra. Në kushtet kur ligji parashikon pezullimin e menjëhershëm nga detyra të gjyqtarit, për shkak të këtij vendimi Këshilli i Emërimeve në Drejtësi në datën 11.12.2019 ka realizuar përsëri shortin manual. Sipas shortit, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, u caktua anëtarja e Këshillit, zonja Vitore Tusha. Për shkak të përfundimit të mandatit të Këshillit të Emërimeve në Drejtësi (i përkohshëm) 2019, zhvillimi i procedurave të verifikimit për këtë pozicion vakant i kaloi Këshillit të Emërimeve në Drejtësi 2020, i cili në datë 15.01.2020 zhvilloi shortin manual dhe relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit, zonja Saida Dollani. Sipas parashikimit të pikës 5/2, shkronja “b”, të vendimit nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, të ndryshuar, të Këshillit të Emërimeve në Drejtësi, relatorja Saida Dollani kontrollon saktësinë dhe plotësinë e veprimeve të kryera dhe konfirmoi veprimet e relatorëve të mëparshëm.

8. Zonja Ardita Buna (Alsula), si një ndër kandidatet që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, është njoftuar me shkrim për t'u paraqitur pranë Këshillit të Emërimeve në Drejtësi për të vijuar me përmbushjen e procedurave të verifikimit të kandidaturës. Njoftimi me shkrim, i kryer në rrugë elektronike në adresën e deklaruar nga vetë kandidatja Ardita Buna (Alsula), gjendet i administruar në dosjen e kandidimit.

9. Në datën 23.09.2019, kandidatja Ardita Buna (Alsula) është paraqitur pranë Këshillit të Emërimeve në Drejtësi dhe është pajisur me formularët e deklaramit dhe autorizimet që duhet të plotësohen për qëllimet e vijimit të procedurës së verifikimit të kandidaturës së saj. Kryerja e kësaj procedure vërtetohet nga nënshkrimi prej vetë kandidates të deklaratës përkatëse, e cila gjendet e administruar në dosjen e kandidimit.

10. Në datën 24.09.2019, kandidatja Ardita Buna (Alsula) ka depozituar në sekretarinë e Këshillit të Emërimeve në Drejtësi formularë të deklaramit dhe autorizimet përkatëse për qëllimet e vijimit të procedurës së verifikimit të kandidaturës së saj, të cilat gjenden të administruara në dosjen e kandidimit.

11. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e pasurisë, në zbatim të shkronjës “dh” të nenit 7/a të Ligjit nr. 8577/2000, të nenit 235 të Ligjit nr. 115/2016, si edhe në zbatim të pikës 60 të Vendimit nr. 4, datë 11.03.2019

*“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, me shkresën nr. 548 prot., datë 04.10.2019, Këshilli i ka dërguar ILDKPKI-së listën e kandidatëve dhe personave të lidhur me ta që i nënshtrohen procedurës së verifikimit të kushteve dhe kriterëve të tjera ligjore të kandidimit sipas Ligjit nr. 8577/2000 dhe Ligjit nr. 115/2016.

12. Bashkëlidhur kësaj shkrese drejtuar ILDKPKI-së, ndërmjet të tjerave, është vendosur edhe Deklarata e nënshkruar nga kandidatja Ardita Buna (Alsula), ku tregohet se është pajisur me formularët e deklarimit dhe autorizimet që duhet të plotësohen për qëllimet e procedurës së verifikimit të kandidaturës së saj, si edhe data e nënshkrimit, nga e cila fillojnë të llogariten afatet e përcaktuara nga ligji për përmbushjen e detyrimeve ligjore të kandidates për procedurën e verifikimit të kandidaturës.

13. Me shkresën nr. 107/27 prot., datë 06.11.2019, ILDKPKI-ja ka informuar Këshillin e Emërimeve në Drejtësi se kandidatja Ardita Buna (Alsula) e ka përmbushur detyrimin e përcaktuar nga pika 2 e nenit 235 të Ligjit nr. 115/2016 për të dorëzuar të plotësuar pranë atij institucioni Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë. Ajo e ka dorëzuar deklaratën e pasurisë dhe konfliktit të interesit pranë ILDKPKI me datë 05.09.2019.

14. ILDKPKI, në zbatim të nenit 235 të Ligjit nr. 115/2016, të Ligjit nr. 9049/2003, *“Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë”*, të ndryshuar, (në vijim ligji nr. 9049/2003) dhe Ligjit nr. 9367/2005, *‘Për parandalimin e konfliktit të interesave në ushtrimin e funksioneve publike’*, i ndryshuar, (në vijim ligji nr. 9367/2005), me shkresën nr. 4186/6 prot., datë 06.11.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidaten Ardita Buna (Alsula) dhe personat e lidhur me të.

15. Gjithashtu, në funksion të ushtrimit të kompetencave të tij për verifikimin e plotësimit të kushteve dhe kriterëve ligjore të kandidimit, për sa i përket kontrollit të pasurisë, në zbatim të pikës 4 të nenit 229 dhe 235 të Ligjit nr. 115/2016, të shkronjës “e” të pikës 20, 24, shkronjës “b” të pikës 60 e vijues të Vendimit nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, edhe ky Këshill ka kryer veprimet verifikuese të kërkit nga subjekte publike dhe private, të të dhënave mbi pasuritë, interesat private dhe detyrimet financiare që ekzistojnë në emër dhe për llogari të kandidates Ardita Buna (Alsula) dhe personave të lidhur me të.

16. Për realizimin e veprimeve verifikuese të lidhura me kontrollin e pasurisë së kandidates Ardita Buna (Alsula), Këshilli i Emërimeve në Drejtësi, në datë 09.10.2019, i është drejtuar me kërkesa për informacion dhe ka marrë përgjigjet përkatëse me të dhënat e kërkuara nga secili prej institucioneve publike dhe subjekteve private (të cilat janë administruar në dosjen e kandidimit), si vijon:

- a) Institucioneve bankare: (1) Banka Alpha Albania, (2) Banka Amerikane e Investimeve, (3) Banka Credins, (4) Banka e Bashkuar e Shqipërisë, (5) Banka e Parë e Investimeve, (6) Banka Intesa Sanpaolo, (7) Banka Kombëtare Tregtare, (8) Banka Procredit, (9) Banka Raiffeisen, (10) Banka Societe Generale, (11) Banka Tirana dhe (12) Banka Union.

- b) Institucione financiare të licencuara nga Banka e Shqipërisë: (1) Ak-Invest, (2) Albania Leasing, (3) Capital Invest, (4) Easypay sh.p.k, (5) Final sha, (6) Fondi Besa, (7) Iutecredit Albania, (8) Landeslease, (9) M – Pay sh.p.k. (10) NOA sha, (11) Porsche Leasing, (12) Posta Shqiptare, (13) Raiffeisen Leasing, (14) Tirana Factoring & Lease, (15) Tranzit sha, (16) Union Financiar Tiranë.
- c) Subjekte financiare të licencuar nga AMF: (1) Fondi i Pensionit Vullnetar Credins Pension, (2) Fondi i Investimit Credins Premium, (3) Fondi i Investimit Raiffeisen Invest Euro, (4) Fondi i Investimit Raiffeisen Prestigj, (5) Fondi i Investimit Raiffeisen Vision, (6) Fondi i Investimit WVP Top Invest, (7) Fondi i Pensionit Vullnetar Raiffeisen, (8) Fondi i Pensionit Vullnetar Sigal.
- ç) Institucione të tjera publike si: (1) Agjencia Shtetërore e Kadastrës, (2) DPSHTRR, (3) Drejtoria e Përgjithshme e Tatimeve, (4) Ministria e Drejtësisë, (5) OSHEE, (6) QKB, (7) UKT.

17. Në përgjigje të kërkesave për informacion të Këshillit të Emërimeve në Drejtësi, institucionet publike dhe subjektet private të treguara në pikën 16 më sipër, kanë dërguar pranë Këshillit përgjigjet përkatëse, përjashtimit Banka Alpha Albania sh.a., e cila, deri në momentin e përpilimit të këtij akti, nuk ka kthyer përgjigje.

18. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e integritetit, në zbatim të shkronjës “ç” të nenit 7/a të Ligjit nr. 8577/2000, të nenit 236 të Ligjit nr. 115/2016, si edhe në zbatim të pikës 82 të Vendimit nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, me shkresën nr. 603 prot., datë 09.10.2019, Këshilli ka dërguar në Prokurorinë e Përgjithshme për kompetencë formularin e vetëdeklarimit të plotësuar nga kandidatja Ardita Buna (Alsula) sipas Ligjit nr. 138/2015, ‘Për garantimin e integritetit të personave që zgjidhen, emërohen ose ushtrojnë funksione publike’ (në vijim ligji nr. 138/2015).

19. Prokuroria e Përgjithshme, me shkresën nr. 2153/140 prot., datë 04.12.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidaten Ardita Buna (Alsula).

20. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e integritetit të kandidates Ardita Buna (Alsula), në zbatim të shkronjës “ç” të nenit 7/a të Ligjit nr. 8577/2000, të nenit 236 të Ligjit nr. 115/2016, si edhe në zbatim të pikës 84 të Vendimit nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, Këshilli i është drejtuar më kërkesë për informacion Drejtorisë së Sigurisë së Informacionit të Klasifikuar (shkresa nr. 602 prot., datë 09.10.2019) dhe Shërbimit për Çështjet e Brendshme dhe Ankesat pranë Ministrisë së Brendshme (shkresa nr. 604 prot., datë 09.10.2019).

21. Gjithashtu, Këshilli i Emërimeve në Drejtësi, në vijim të procedurës së sipërcituar për verifikimin e integritetit, me shkresën nr. 602 prot., datë 09.10.2019, i është drejtuar Drejtorisë së Sigurisë së Informacionit të Klasifikuar me kërkesë për ndihmë administrative për përpunimin e informacionit të klasifikuar për qëllimet e verifikimit të integritetit të kandidatëve.

22. Drejtoria e Sigurisë së Informacionit të Klasifikuar ka dërguar me shkresën nr. 3775 prot., datë 21.11.2019 përgjigjen lidhur me informacionin e kërkuar nga Këshilli i Emërimeve në Drejtësi. Ndërkohë Shërbimi për Çështjet e Brendshme dhe Ankesat pranë Ministrisë së Brendshme ka dërguar përgjigjen e saj me shkresën nr. 2155 prot., datë 22.10.2019.

23. Për verifikimin dhe kontrollin e integritetit, në zbatim të nenit 236 të Ligjit nr. 115/2016, të dispozitave të Ligjit nr. 45/2015, "Për të drejtën e informimit për dokumentet e ish-sigurimit të shtetit të Republikës Popullore Socialiste të Shqipërisë" (në vijim ligji nr. 45/2015), si edhe në zbatim të pikës 85 të Vendimit nr. 4, datë 11.03.2019 "Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë", me shkresën nr. 601 prot., datë 09.10.2019, Këshilli ka dërguar formularin e aplikimit përkatës të plotësuar sipas ligjit nga kandidatja Ardita Buna (Alsula) për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit.

24. Autoriteti për Informimin mbi Dokumentet e Ish-Sigurimit të Shtetit, me shkresën nr. 1386/4 prot., datë 25.10.2019, ka dërguar Vendimin nr. 671 datë 25.10.2019 pranë Këshillit të Emërimeve në Drejtësi me rezultatet e kontrollit të ushtruar për kandidaten Ardita Buna (Alsula).

25. Për verifikimin e kushteve dhe kriterëve ligjore të kandidimit, në zbatim të shkronjave "b", "c" dhe "d" të pikës 1, pikës 2 dhe 3 të nenit 7/a të Ligjit nr. 8577/2000, të nenit 237 dhe 240 të Ligjit nr. 115/2016, si edhe në zbatim të pikave 91 e 93 të Vendimit nr. 4, datë 11.03.2019 "Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë", Këshilli ka shqyrtuar dokumentacionin përkatës të depozituar nga vetë kandidatja Ardita Buna (Alsula) në momentin e kandidimit pranë organit të emërtesës që ka shpallur vendin vakant.

26. Lidhur me kushtin e kandidimit të parashikuar nga pika 5 e nenit 125 të Kushtetutës dhe shkronja "c" e pikës 1 të nenit 7/a të Ligjit nr. 8577/2000, pra që kandidati të mos ketë mbajtur pozicione drejtuese në parti politike gjatë 10 viteve të fundit nga data e kandidimit, Këshilli në datën 16.10.2019 i është drejtuar me kërkesë për informacion partive politike, duke i bashkëlidhur listat e të gjithë kandidatëve për gjyqtar në Gjykatën Kushtetuese. Në përgjigje të këtyre kërkesave, partitë politike kanë dërguar informacione lidhur me ekzistencën ose jo të të dhënave që do të vërtetonin angazhimin në ndonjë pozicion drejtues në parti politike të secilit prej kandidatëve, përfshirë edhe kandidaten Ardita Buna (Alsula).

27. Këshilli i ka kërkuar kandidates të paraqesë shpjegime me shkrim dhe dokumente shtesë, në zbatim të nenit 235 dhe 237 të Ligjit nr. 115/2016, lidhur me konkluzionet e raportit të ILDKPKI-së. Kandidatja ka dorëzuar pranë Këshillit të Emërimeve në Drejtësi me datë 14.11.2019 parashtrimet respektive dhe i ka bashkëlidhur atyre edhe një shkresë me cilësinë e provës. Gjithashtu Këshilli i ka kërkuar kandidates, zonjës Ardita Buna (Alsula), me emailin e datës 12.02.2020, sqarime shtesë për masat disiplinore të marra dhe të evidentuara në dokumentacionin e administruar. Kandidatja me emailin e datës 14.02.2020 ka dhënë sqarimet e saj dhe bashkëlidhur email-it ka paraqitur edhe dy vendime të Gjykatës Kushtetuese dhe Gjykatës Administrative të Apelit.

28. Gjithashtu për këtë rast kandidimi, Këshilli vlerësoi t'i drejtohet me kërkesa për informacion disa institucioneve publike dhe subjekte private, pranë të cilave kandidatja Ardita Buna (Alsula) ka ushtruar funksione publike ose veprimtari private profesionale apo

ku gjenden të dhëna lidhur me ushtrimin e detyrave dhe veprimtarinë profesionale të kandidatit si Ministria e Drejtësisë (*shkresa 680 prot., datë 18.10.2019*); Qendra e Botimeve Zyrtare (*shkresa nr. 681 prot., datë 18.10.2019*); Universiteti “Qirjazi” (*shkresa nr. 682 prot., datë 18.10.2019*); Universitetit “Luigj Gurakuqi”, Fakulteti i Drejtësisë (*shkresa nr. 683 prot., datë 18.10.2019*); Alb Juris (*shkresa nr. 684 prot., datë 18.10.2019*).

29. Lidhur me të dhënat e kërkuara, Këshilli ka marrë përgjigje me shkrim nga Ministria e Drejtësisë (*shkresa nr. 7120/1 prot., datë 31.10.2019*); Qendra e Botimeve Zyrtare (*shkresa nr. 1462/1, datë 24.10.2019*); Universiteti “Qirjazi” (*shkresa nr. 275 prot., datë 23.10.2019*).

30. Në përfundim të veprimeve dhe procedurave të kontrollit dhe verifikimit, në zbatim të neneve 235, 236 dhe 237 të Ligjit nr. 115/2016, si edhe të pikave 76 dhe 77 të Vendimit nr. 4 datë 11.03.2019, duke vlerësuar se ka të dhëna që mund të sjellin ndalimin e kandidimit, anëtari i Këshillit relator i çështjes ka proceduar me përgatitjen e relacionit përkatës mbi gjendjen e faktit dhe të ligjit të zbatueshëm dhe e ka dërguar çështjen për shqyrtim në mbledhjen e Këshillit.

31. Në zbatim të pikës 33 të Vendimit të nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, zv/Kryetari ka thirrur mbledhjen e Këshillit duke njoftuar anëtarët për zhvillimin e saj në datën 17.07.2020, ora 13.30, rendin e ditës, duke i bashkëlidhur njoftimit materialet e çështjes. Në rendin e ditës është përfshirë edhe çështja me objekt: “Për gjetjet në procedurën e verifikimit të kandidaturës së zonjës Ardita Buna (Alsula) në vendin vakant për Gjyqtar në Gjykatën Kushtetuese, shpallur nga Kuvendi i Republikës në datën 28.08.2018 dhe rishpallur në datë 21.08.2019”.

32. Në zbatim të pikës 34 të Vendimit nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, dita dhe koha e zhvillimit të mbledhjes, së bashku me relacionin e përgatitur nga relatori, i është njoftuar kandidates Ardita Buna (Alsula) me e-mail, në datën 14.07.2020.

33. I njëjti njoftim, së bashku me dokumentacionin e përgatitur nga relatori mbi veprimet e kryera gjatë procedurës së verifikimit, si edhe materiale të çështjes, i janë dërguar edhe Avokatit të Popullit.

34. Për zhvillimin e mbledhjes së Këshillit në datën 17.07.2020, ora 13.30, rendin e ditës dhe relacionin e përgatitur janë njoftuar edhe subjektet që sipas ligjit ftohen të marrin pjesë në mbledhjet e Këshillit.

35. Dita dhe koha e zhvillimit të mbledhjes, si edhe rendi i ditës janë njoftuar publikisht edhe në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

36. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoi mendimin e Avokatit të Popullit lidhur me mënyrën e procedimit të ndjekur për verifikimin e kandidates Ardita Buna (Alsula).

37. Avokati i Popullit parashtrroi se ishte dakord në thelb me procedurën e ndjekur për verifikimin e kandidatës dhe ka sugjeruar disa elemente shtesë që duhet të përmbajë në të ardhmen relacioni në lidhje me përcaktimin e kohës së veprimeve (të përfundimit të hetimit prej relatorit apo të komunikimit të gjetjeve kandidatit). Po ashtu, sugjeroi që në drejtim të verifikimit të kriterit ndalues që lidhet me pasjen e pozicioneve drejtuese në parti politike të komunikohet në të ardhmen edhe me KQZ-në.

## **II. Vlerësimi i Këshillit të Emërimeve në Drejtësi**

38. Këshilli i Emërimeve në Drejtësi, duke u bazuar në dispozitat ligjore dhe ato nënligjore normative të zbatueshme për çështjen në shqyrtim, si edhe në rrethanat e faktit që rezultojnë në aktet që përmban dosja e kandidimit, vlerëson se duhet të procedojë me vendim për ndalimin e kandidimit të kandidatës Ardita Buna (Alsula) për vendin vakant në Gjykatën Kushtetuese të shpallur nga Kuvendi në datën datën 28.08.2018 dhe rishpallur në datën 21.08.2019.

39. Në pikën 4 dhe 5 të nenit 125 të Kushtetutës, parashikohet parimisht se:

*“4. Gjyqtarët e Gjykatës Kushtetuese duhet të kenë arsim të lartë juridik, të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike, me një veprimtari të spikatur në fushën e së drejtës kushtetuese, të drejtave të njeriut ose në sfera të tjera të së drejtës.*

*5. Gjyqtari nuk duhet të ketë mbajtur funksione politike në administratën publike ose pozicione drejtuese në një parti politike gjatë 10 vjetëve të fundit përpara kandidimit. Kriteret e tjera, si dhe procedura për emërimin dhe zgjedhjen e gjyqtarëve të Gjykatës Kushtetuese rregullohen me ligj.”*

40. Në pikën 1 dhe 2 të nenit 7/a të ligjit nr. 8577/2000 parashikohet se:

*“1. Gjyqtari i Gjykatës Kushtetuese mund të zgjidhet shtetasi shqiptar që përmbush këto kushte:*

*a) të ketë zotësi të plotë për të vepruar;*

*b) të ketë mbaruar arsimin e lartë juridik, Diplomë e Nivelit të Dytë;*

*c) të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë 10 viteve të fundit nga data e kandidimit;*

*ç) të mos jetë në procedim penal dhe të mos jetë dënuar me burgim për kryerjen e një vepre penale;*

*d) të mos jetë larguar nga detyra për shkaqe disiplinore dhe të mos ketë masë disiplinore në fuqi;*

*dh) të ketë kaluar me sukses procesin e kontrollit dhe verifikimit të pasurisë së tij personale dhe të familjarëve të tij, sipas ligjit.*

*2. Kandidati që përmbush kushtet e parashikuara në pikën 1 të këtij neni, duhet të plotësojë edhe këto kritere:*

*a) të ketë përvojë pune jo më pak se 15 vjet si gjyqtar, prokuror, avokat, profesor ose lektor i së drejtës, jurist i nivelit të lartë në administratën publike;*

*b) të ketë një veprimtari të njohur në fushën e të drejtës kushtetuese, të drejtave të njeriut ose sfera të tjera të së drejtës;*

*c) të jetë vlerësuar për aftësitë profesionale dhe integritetin etik e moral.”.*



41. Kushtet e kandidimit për gjyqtar në Gjykatën Kushtetuese, të parashikuara nga Kushtetuta dhe ligji organik i dalë në pajtim me të, duhet të plotësohen secili dhe të gjitha së bashku në mënyrë që kandidati të pranohet për t'u vlerësuar dhe renditur sipas meritave nga Këshilli i Emërimeve në Drejtësi dhe më tej për t'u emëruar si gjyqtar në Gjykatën Kushtetuese nga organi respektiv i emërtesës.

42. Nga shqyrtimi i dokumentacionit të administruar në dosje rezulton se kandidatja Ardita Buna (Alsula) plotëson kushtin e arsimit të lartë juridik, pasi ka një Diplomë të Nivelit të Dytë, sikurse kërkohet nga pika 4 e nenit 125 të Kushtetutës dhe shkronja "b", pika 1, neni 7/a Ligji nr. 8577/2000. Kështu rezulton se kandidatja Ardita Buna (Alsula) ka përfunduar studimet e larta në Universitetin e Tiranës në Fakultetin e Drejtësisë në periudhën 1989 - 1993, duke u diplomuar si "*Jurist*". Në zbatim të Ligjit nr. 80/2015, "Për arsimin e lartë dhe kërkimin shkencor në institucionet e arsimit të lartë në Republikën e Shqipërisë" ky lloj arsimimi kualifikohet si arsim i lartë juridik, Diplomë e Nivelit të Dytë.

43. Nga dokumentacioni i konfirmuar i institucioneve kompetente, Këshillit të Emërimeve në Drejtësi i rezulton se kandidatja Ardita Buna (Alsula) plotëson kushtin e vjetërsisë në punë të parashikuar nga pika 4 e nenit 125 të Kushtetutës dhe shkronja "a" e pikës 2 të nenit 7/a të Ligjit nr. 8577/2000. Kështu kandidatja Ardita Buna (Alsula) rezulton të ketë 15 vjet vjetërsi në punë si lektore e së drejtës dhe nëpunëse e nivelit të lartë në administratën publike. Nga dokumentacioni i administruar në dosje rezulton se kandidatja Ardita Buna (Alsula) ka ushtruar veprimtari profesionale si më poshtë:

- a) Lektore e së drejtës pranë Universitetit "Luigj Gurakuqi", Fakulteti i Drejtësisë, në periudhën shtator 1993 – shtator 1996;
- b) Specialist në Drejtorinë e Kodifikimit pranë Ministrisë së Drejtorisë në periudhën shtator 1996 – shkurt 1998;
- c) Drejtor i Qendrës së Botimeve Zyrtare në periudhën shkurt 1998 – nëntor 2007;
- d) Drejtor i Qendrës së Botimeve Zyrtare në periudhën tetor 2013 – maj 2018;
- e) Lektore e së drejtës në Fakultetin e Drejtësisë së Universitetit "Qirjazi" në periudhën tetor 2018 dhe në vazhdim.

44. Lidhur me verifikimin dhe kontrollin e integritetit, Prokuroria e Përgjithshme, me shkresën nr. 2153/140 prot., datë 04.12.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidaten Ardita Buna duke ardhur në përfundimet se:

*1) Subjekti deklaruës Ardita Aqif Buna (Alsula), kandidate për gjyqtar në Gjykatën Kushtetuese, nuk përfshihet në fushën e nenit 2 të ligjit nr. 138/2015 "Për garantimin e integritetit të personave që zgjidhen, emërohen ose ushtrojnë funksione publike".*

45. Autoriteti për Informimin mbi Dokumentet e Ish-Sigurimit të Shtetit, me shkresën nr. 1386/4 prot., datë 25.10.2019, ka dërguar Vendimin nr. 671, datë 25.10.2019 pranë Këshillit të Emërimeve në Drejtësi me rezultatet e kontrollit të ushtruar për kandidaten Ardita Buna (Alsula), duke ardhur në përfundimet se:

*a) Për zonjën Ardita Buna, nga verifikimet e kryera deri tani nuk figurojnë të ketë materiale në dokumentet të ish-Sigurimit të Shtetit në emër të tij, sipas nenit 29, pika 2 të Ligjit nr. 45/2015 "Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë".*

46. Drejtoria e Sigurisë së Informacionit të Klasifikuar me aktin shkresor nr. 3775 prot., datë 21.11.2019, është përgjigjur se:

a) Nuk disponohen të dhëna/informacione që bien në kundërshtim me kërkesat e pikës 89 gërmat a dhe c, për integritetin e figurës së Zj. Ardita Aqif Buna (Alsula), kandidate për gjyqtar në Gjykatën Kushtetuese.

47. Shërbimi për Çështjet e Brendshme dhe Ankesat pranë Ministrisë së Brendshme ka dërguar përgjigjen e saj me shkresën nr. 2155 prot., datë 22.10.2019, nga ku rezulton se, në lidhje me kandidaten Ardita Buna:

a) Nuk figurojnë të evidentuar për veprimtari kriminale.

48. Nisur nga rezultatet si më sipër, Këshilli vjen në përfundimin se kandidatja Ardita Buna (Alsula), në zbatim të nenit 236 të ligjit nr. 115/2016, **nuk gjendet në kushtet që mund të sjellin ndalimin e kandidimit.**

49. Këshilli i Emërimeve në Drejtësi, në vijim, konstaton se kandidatja Ardita Buna (Alsula) plotëson edhe kushtin e parashikuar në pikën 5 të nenit 125 të Kushtetutës dhe shkronjën “c” të pikës 1 të nenit 7/a të ligjit nr. 8577/2000. Nga përgjigjet në shkresat zyrtare të dërguara në adresë të Këshillit të Emërimeve në Drejtësi nga partitë politike rezultoi se kandidatja Ardita Buna (Alsula) nuk ka ushtruar funksione politike në administratën publike dhe nuk ka mbajtur pozicione drejtuese në parti politike gjatë 10 viteve të fundit nga data e kandidimit.

50. Nisur nga të dhënat dhe gjetjet që rezultojnë nga procedura e verifikimit për kandidaten Ardita Buna (Alsula), Këshilli i Emërimeve në Drejtësi vlerësoi të bisedojë dhe të konkludojë pikësëpari në lidhje me plotësimin ose jo të kushtit ligjor të parashikuar nga neni 7/a pika 1 shkronja “dh” ligjit nr. 8577/2000, pra që kandidati për gjyqtar në Gjykatën Kushtetuese të ketë kaluar me sukses procesin e kontrollit dhe verifikimit të pasurisë së saj personale dhe të familjarëve së saj, sipas ligjit.

51. Për sa i përket procedurës së verifikimit të pasurisë, në përfundim të veprimeve të kontrollit të ushtruar në zbatim të nenit 235 të Ligjit nr. 115/2015, të Ligjit nr. 9049/2003, i ndryshuar dhe Ligjit nr. 9367/2005, i ndryshuar, ILDKPKI-ja me shkresën nr. 4186/6 prot., datë 06.11.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidaten Ardita Buna (Alsula) dhe personat e lidhur me të. Në këtë shkresë ILDKPKI-ja ka bashkëlidhur shkresën nr. 107/25 prot., datë 10.10.2019 të ILDKPKI-së, në të cilën është analizuar dhe konkluduar mbi kontrollin e pasurisë dhe konfliktin e interesit të kandidates Ardita Buna (Alsula) për llogari të kandidimit për gjyqtare në Gjykatën Kushtetuese. Për rrjedhojë analiza dhe konkluzionet do të merren në këtë dokument.

52. Në përfundim të analizës së hollësishme financiare të kryer mbi bazën e gjetjeve të siguruar nga informacionet e dërguara nga institucione publike dhe subjekte private, lidhur me deklarin e pasurisë dhe interesave private të kandidates Ardita Buna (Alsula), ILDKPKI-ja në raportin e paraqitur ka ardhur në përfundimet se:

- Mungesë dokumentacioni justifikues ligjor lidhur me të ardhurat e deklaruara nga bursat e Universitetit të Trentos, College of Laë London, Trinity College Dublin, IDAIC, UNIDROIT në vlerën totale 23.300.000 Lireta dhe 7.300 Paund;
- Mungesë dokumentacioni justifikues financiar lidhur me të ardhurat e deklaruara pranë Univeristetit të Shkodrës, Ministrisë së Drejtësisë, Fakultetit të Drejtësisë, shoqërisë Alb Juris sh.p.k., Kolegjit Qirjazi;

- Mungesë dokumentacioni justifikues ligjor lidhur me të ardhurat që kanë shërbyer për blerjen e apartamentit me sipërfaqe 55 m<sup>2</sup> në rrugën e Barrikadave Tiranë në vitin 2002, deklaruar në vlerën 2.000.000 Lekë;
- Mospërputhje e vlerës së deklaruar për apartamentin me sipërfaqe 55 m<sup>2</sup> rruga e Barrikadave Tiranë, të blerë në vitin 2002, pasi është deklaruar 2.000.000 Lekë ndërsa kontrata e shitblerjes rezulton të jetë në vlerën 200.000 Lekë;
- Mospërputhje për sipërfaqen e pasurisë garazh, rruga “Kongresi i Manastirit”, Tiranë, pasi në kontratën e porosisë datë 27.06.2014 është përcaktuar sipërfaqja 200 m<sup>2</sup>, ndërsa nga kandidati deklarohet 240 m<sup>2</sup>;
- Konstatohet se për blerjen e garazhit me sipërfaqe 240 m<sup>2</sup>, Tiranë, ndër të tjera është deklaruar si burim kredia në vlerën 4.000.000 Lekë pranë Bankës Kombëtare Tregtare sh.a., por rezulton që kjo kredi është disbursuar pas lidhjes së kontratës së porosisë, gjithashtu përcaktohet se është marrë për rikonstruksion banese.

53. Për rrjedhojë ILDKPKI-ja ka konkluduar se, pas veprimeve verifikuese të kryera, konstatohet se për kandidaten Ardita Buna (Alsula):

- *Deklarimi nuk është i saktë në përputhje me ligjin;*
- *Ka mungesë dokumentacioni justifikues ligjor për të justifikues pasurinë;*
- *Nuk ka kryer fshehje të pasurisë;*
- *Nuk ka kryer deklarim të rremë;*
- *Kandidati nuk gjendet në situatën e konfliktit të interesit.*

54. Nga ana e Këshillit të Emërimeve në Drejtësi, mbi gjetjet e sipërcituara, është njoftuar kandidata në datë 08.11.2019, në rrugë elektronike, për të dhënë shpjegimet përkatëse mbi këto gjetje, si dhe të depozitojë çdo dokument justifikues që ajo disponon.

55. Kandidata Ardita Buna (Alsula) ka paraqitur me shkrim shpjegime dhe dokumente shtesë pranë Këshillit me datë 14.11.2019 në lidhje me raportin e hartuar nga Inspektoriati i Lartë i Deklarimit dhe Kontrollit të Pasurive. Kandidata në shkresë ka sqaruar se:

- *Përsa i përket konkluzionit se dokumentacioni justifikues në lidhje me të ardhurat e deklaruar nga bursat, punësimi etj është jo i plotë, bashkëlidhur po dërgoj një dokument shtesë që kam siguruar gjatë këtyre ditëve, konkretisht një artikull historik nga IDAIC (Instituti për Unifikimin e të Drejtës Agrare të Krahësuar) ku përmendet emri im si bursiste dhe një vërtetim të lëshuar nga Universiteti i Shkodrës për të ardhurat nga punësimi për periudhën 1993 - 1996. Këto të ardhura nuk kanë shërbyer si burim për të krijuar pasuri të luajtshme apo të paluajtshme;*
- *Është i pabazuar konkluzioni se ka deklarim të pasaktë të çmimit të shitjes së apartamentit me sip. 55 m<sup>2</sup>, të ndodhur në “Rrugën e Barrikadave” dhe se çmimi prej 200.000 Lekë gjykohet të jetë i ulët referuar zonës dhe vitit të blerjes. Me shitësit, z. Fadil Paçrami dhe z. Fatos Paçrami kemi lidhje të ngushtë familjare dhe kjo është arsyeja e shitjes së apartamentit jo me çmimin e tregut, por në kontratë është vendosur çmimi real i shitjes (shiko deklaratën noteriale nr. 2323 Rep., nr. 776/3 kol., datë 23.10.2019). Nuk jam në situatën e konfliktit të interesit apo të përfitimit për shkak të detyrës publike. Për më tepër, kjo pasuri është fituar nga bashkëshorti im para lidhjes së martesës dhe nuk kam patur asnjë mundësi të përcaktoj kontratën e shitjes;*
- *Përsa i përket konkluzionit se ka pasaktësi në deklarimin e sipërfaqes së pasurisë garazh, rruga “Kongresi i Manastirit”, ku sipërfaqja është 200 m<sup>2</sup> dhe është deklaruar 240 m<sup>2</sup>, unë i jam referuar çertifikatës së pronësisë së karabinasë dhe diferenca prej 40 m<sup>2</sup> është pjesa e përbashkët e gjithë pallatit. Kjo diferencë nuk ka ndikuar gjithsesi në çmimin e blerjes;*

- *Është i pabazuar konkluzioni se kontrata e kredisë që ka shërbyer si burim i pjesshëm i krijimit të pasurisë garazh, në fakt është lidhur pas datës së kontratës së porosisë. Kontrata e kredisë është lidhur një muaj para se të lidhej kontrata e porosisë për garazhin dhe ndërkohë pritej disbursimi. Në momentin e lidhjes së kontratës porositësit i është paguar tërësisht vlera tjetër me përjashtim të vlerës që mbulonte kredia. Ky fakt ishte i njohur nga shitësi, i cili për shkak të besimit që kishte tek blerësi (për shkak të njohjeve që në fëmijëri me bashkëshortin tim), ra dakord që në kontratë të shënohej sikur vlera ishte likuajuar tërësisht.*
- *Bashkëlidhur parashtrimeve gjendet shkresa me lëndë "Vërtetim" me nr. 2883/1 prot., datë 09.09.2019 e lëshuar nga Universiteti i Shkodrës "Luigj Gurakuqi".*

56. Këshilli i Emërimeve në Drejtësi verifikoi përputhshmërinë e të dhënave të deklaruara nga kandidatja Ardita Buna (Alsula) në "*Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë*", që ka depozituar pranë ILDKPKI-së, mbi bazën e të cilave ky institucion ka realizuar analizën financiare dhe ka ardhur në përfundimet e tij, në raport me të dhënat që rezultojnë nga informacionet e dërguara pranë Këshillit nga institucionet publike dhe private të treguara më lart në këtë vendim. Po ashtu konstatohet se Alpha Bank nuk i është përgjigjur shkresës së dërguar për të dhënë informacion, por Këshilli vëren se kjo bankë i ka kthyer përgjigje ILDKPKI-së dhe nuk rezulton që për këtë kandidatë të ketë të dhëna financiare nga ky institucion që ndikojnë në konkluzionet e ILDKPKI-së. Gjithashtu, Këshilli u bazua edhe në shpjegimet dhe dokumentacionin shtesë të paraqitur nga kandidatja, Znj. Ardita Buna (Alsula).

57. Në përballje të fakteve dhe konkluzioneve të gjetura dhe të arritura nga ILDKPKI-ja, sipas të cilave për znj. Ardita Buna (Alsula) "*Deklarimi nuk është i saktë në përputhje me ligjin*" dhe "*Ka mungesë dokumentacioni justifikues ligjor për të justifikuar pasurinë*", me të drejtën e parashikuar nga neni 235 i Ligjit nr. 115/2016, evidentohet se Znj. Ardita Buna (Alsula), nuk ka sukses në kalimin e procesit të kontrollit dhe verifikimit të pasurisë së saj personale dhe të familjarëve të saj. Kështu, nga deklarimet e kryera dhe nga dokumentacioni i administruar nga Këshilli, sikurse ka konkluduar edhe ILDKPKI-ja, konstatohet se ka mospërputhje të çmimit të blerjes së apartamentit në vitin 2002 në raport me vlerën e individualizuar në kontratën e shitjes. Gjithashtu, pasaktësi është vërejtur edhe në mënyrën e realizimit të kontratës së porosisë në raport me madhësinë e sendit (garazh) objekt të kontratës së porosisë, si dhe mospërputhje midis shkakut të marrjes së kredisë (rikonstruksion banese), me përdorimin e shumës së disbursuar (për blerjen e garazhit). Dokumentacioni i paraqitur pranë ILDKPKI-së dhe Këshillit të Emërimeve në Drejtësi prej kandidatës, për të justifikuar deklarimet apo pretendimet e saj, nuk kanë arritur të provojnë të kundërtën e konkluzioneve të paraqitura si më lart. Në këto rrethana, Këshilli i Emërimeve në Drejtësi konkludon se kandidatja Ardita Buna (Alsula) nuk plotëson kushtet e parashikuara nga Ligji nr. 8577/2000 i ndryshuar, konkretisht në shkronjën "dh" të pikës 1 të nenit 7/a, të ligjit të cituar.

58. Nisur nga sa analizohet dhe arsyetohet më sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacionin që përmban dosja e kandidimit, në interpretim dhe zbatim të ligjit të zbatueshëm për kushtet dhe kriteret e kandidimit për gjyqtar në Gjykatën Kushtetuese, Këshilli i Emërimeve në Drejtësi vjen në përfundimin se duhet të vendoset ndalimi i kandidimit të kandidatës Ardita Buna (Alsula), në vendin vakant për gjyqtar në Gjykatën Kushtetuese të shpallur nga Kuvendi i Republikës në datën 28.08.2018 dhe rishpallur në datën 21.08.2019.

## PËR KËTO ARSYE:

Në mbështetje të pikës 1 të nenit 149/d dhe nenit 125 të Kushtetutës, të nenit 7/a dhe 7/c të ligjit nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të pikës 3 të nenit 229, të pikës 3 të nenit 229, pikës 4 të nenit 235, pikës 5 të nenit 236 dhe pikës 3 të nenit 237, të ligjit nr. 115/2016 “Për organet e qeverisjes së sistemit të drejtësisë”, si edhe të shkronjës “b” të pikës 50 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, i ndryshuar, Këshilli i Emërimeve në Drejtësi,

## VENDOSI:

1. Ndalimin e kandidimit të kandidates Ardita Buna (Alsula), në vendin vakant për gjyqtar në Gjykatën Kushtetuese, të shpallur nga Kuvendi i Republikës në datën 28.08.2018 dhe rishpallur në datën 21.08.2019.

2. Në zbatim të nenit 238 të ligjit nr. 115/2016, ky vendim i njoftohet kandidates Ardita Buna (Alsula).

3. Kandidatja Ardita Buna (Alsula) ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.

4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

Zv/KRYETARE

Vitore TUSHA

